



Annunzias da baghegiar

All'istanza da baghegiar ei sin fundament digl art. 40 dall'ordinaziun davart la planisaziun dil territori dil cantun Grischun (OPTGR) vegniu annunziau suandonts projects:

Nr. 90/2023

Deplazes Manuela, 7104 Versam; remplazzament dalla cuvrida dil tetg dil baghetg nr. 668 sin parcella nr. 6719 a Cumpadials-Bostg.

Nr. 91/2023

Daniel Maissen SA, 7172 Rabijs; tschentar figura cun tabla da reclama sin parcella nr. 178 a Rabijs-Luven.

Sumvitg, 23-06-20023

Cumissiu da baghegiar

Invitaziun a workshop «Avegnir vischnaunca Sumvitg»

Il mund semida e las pretensiuns enviers la vischnaunca semidan cuntinuadamein. Ord quei motiv sto la vischnaunca da temps a temps s'occupar cun damondas fundamentalas. Ensemen cun la populaziun vul la suprastanza communal definir finamiras e la via per ils proxims onns. Ord quei motiv envidein nus las convischinas ed ils convischins cordialmein da separticipar al workshop «Avegnir vischnaunca Sumvitg».

datum:	sonda, ils 26-08-2023
uras:	08.30 tochen 13.00 uras workshop; silsunter offerescha la vischnaunca in pign gentar
liug:	casa da scola Rabijs
ulteriu:	sin giavisch vegn mess a disposiziun ina survigilonza d'affons durant il workshop

Il workshop vegn accumpignaus da Tino Zanetti ed Arno Felix dil biro Curia SA. La finamira ei ch'ils participonts san elaborar posiziuns ed ideas per differentas tematicas. Persunter vegn formau gruppas da lavur tier las sutnumnadas tematicas.

gruppa 1:	viver a Sumvitg (<i>purschidas per indigens, promoziun dalla construcziun da habitaziuns, politica da famiglias, mobilitad eav.</i>)
gruppa 2:	veta dil vitg - convivenza (<i>vegliadetgna, giuventetgna, scola, demografia, integraziun, sanadad, loghens da sentupada eav.</i>)
gruppa 3:	turissem e temps liber (<i>svilup turistic, veta dallas uniuns, promoziun/posiziun da cultura e sport, tradiziuns eav.</i>)
gruppa 4:	vischnaunca digitala (<i>transformaziun digitala dalla vischnaunca e dall'administraziun communal, coworking eav.</i>)
gruppa 5:	collaboraziun locala e regionala (<i>fuormas da collaboraziun existentas e futuras, consorzis, collaboraziuns dallas fracziuns, ideas per svilup regional eav.</i>)
gruppa 6:	brat cun populaziun e possessurs da secundas habitaziuns (<i>brat d'uffecis/administraziun communal cun populaziun, pusseivladads da participaziun, attractivitat dalla vischnaunca sco patron e per engaschi per ina autoritad/uffeci, comunicaziun, integraziun da possessurs da secundas habitaziuns en la veta da vischnaunca eav.</i>)
gruppa 7:	svilup economic/agricol (<i>commerci - pusseivladads da svilup, agricultura ed ecologia, diversificaziun dallas entradas communalas, energia eav.</i>)

Per saver preparar il workshop ei in'annunzia necessaria. Nus supplichein tuttas persunas che han interess da prender part al workshop da returnar il formular d'annunzia ch'ei vegnius tarmess per posta entochen ils **26-06-2023**. Sin il formular d'annunzia saveis Vus indicar Vossa tematica preferida. Nus supplichein plinavon d'indicar la tematica che ha per Vus secunda prioritad. Sin fundament dallas annunzias vegnan ils accumpignaders dil project a formar gruppas da lavur ed en quei connex empruar da risguardar las tematicas preferidas annunziadas.

La suprastonza communal selegra sin stedia partecipaziun e sin bunas discussiuns. Lein comunablamein formar igl avegnir dalla vischnaunca da Sumvitg.

Sumvitg, 23-06-2023

Suprastonza communal

REFERENDUM FACULTATIV

La radunonza communal dils 15-06-2023 ha priu denter auter il suandont conclus:

- *Tractaziun ed approvaziun dil project da lavineras per igl uaul da Puzastg e concessiun dil credit brut da 650'000 francs*

Sura conclus ein suttoposts al referendum facultativ tenor art. 30 al. 2 dalla costituziun communal. Il termin da tschaffar il referendum terminescha cun datum dils 13-07-2023. Il referendum sa buca vegnir retratgs.

Sumvitg, 23-06-2023

Suprastonza communal

Protocol dalla radunonza communal dils 15-06-2023

Naven dils 23-06-2023 ei il protocol dalla radunonza communal dils 15-06-2023 exponius public en scaffa avon la canzlia communal e sin la pagina d'internet www.sumvitg.ch duront 30 dis.

Il protocol sa plinavon vegnir retratgs dalla canzlia communal duront las uras da spurtegl. L'administraziun communal porscha plinavon in abbonament en fuorma da pupi.

Convischinas e convischins che han interess d'in tal abbonament ein supplicai da s'annunziar tier l'administraziun communal.

Protestas encunter il protocol san tenor art. 11 dalla lescha da vischnauncas dil cantun Grischun vegnir inoltradas duront il temps d'exposiziun tier la suprastonza communal.

Sumvitg, 23-06-2023

Administraziun communal

Cumpostar ad Igniu/Surrein

Questa stad vegn menau atras ad Igniu in' emprova da cumpostar. La finamira da quell' emprova ei d'elavurar ord differents materials naturals sco grascha, fein, material da pastgets, material da caglias/roma, gliet eav. In custeivel cultem per nos praus, ers ed Orts. Sche vus haveis pia l' intenziun da segar vies contuorn proximamein, saveis purtar il material directamein sonda, **ils 24 da zercladur denter la 8.00–12.00** ad Igniu/Surrein sper la via che meina tier il claus da nuorsas. Il material duess esser frestgs e sto esser schubers da crappa e materials nuscheivels. Mintgin che porta material sa retrer en ca 8 jamnas in pign quantum cumpost per agen diever. Tier damondas saveis seolver tier Paul Fry, 079 693 65 69

Uniun da pescadurs Sumvitg

Pesca comunabla 2023

L'uniun da pescadurs Sumvitg arva la sesiun al lag da Laus cun la pesca comunabla **sonda e dumengia, ils 24 e 25 da zercladur 2023.**

Tgira: La sonda sentupein nus allas 10.00 si sper la tegia da pescadurs, dadora il lag da Laus. Nus seghein, schubergein il lag ed il contuorn sco era far manteniment vid la tegia. Caschun per novs commembers da prestar las uras per entrar ell'uniun.

Pesca: Suenter la finiziun dallas lavurs entscheiva nossa pesca comunabla. Cun interrupziun duront la tscheina ei la pesca aviarta tochen las 22.00. Dumengia, ils 25 da zercladur entschevin allas 5.00 e continuein cun il secund di da pesca che cuoza entochen las 11.00. Cunquei ch'il dretg da pescar ei privats, ei la pesca mo aviarta per commembers/as dall'uniun.

Negina s. Messa: Per la dumengia ein tut ils augsegners e paders occupai ora e nus deplorein, che nus savein buca festivar nossa usitada sontga Messa sper il lag. Mo, in'egliada enviars il tschiel ed in per buns patratgs dueien regurdar nus vida nos anteriurs camerats ch'ei buca pli denter nus ed engraziar per tut ils bials muments che nus havein astgau passentar ensemen.

Traffic: La via naven dil parcadi sisu Laus tochen sil Bostg ei aviarta quels dis. Il tschancun dalla via sut Laus vegn sanaus. Fagei aschi bien e risguardai la signalisaziun a Sumvitg e Cumpadials. Igl ei pusseivel ch'il traffic vegn sviaus sur Miralv/ uaul Puzzastg. Nus selegrein sin ina viseta da tut ils amitgs dalla natira e da viagiari ed envidein tier in paus. Cordialmein envida *l'uniun da pescadurs Sumvitg*

Uniun da dunnas Vinavon

Besuch in Werner's Bio Garten

Werner Koch meina hortulans e hortulanas che s'interesseschon per la cultivaziun bio dinamica atras siu grond e vast iert da jarvas, verduras e pumera, ils 1 da fenadur 2023 allas 15.00–17.00 a Cumpadials, Via Vitg 49.

Suenter la guida vegn purschiu in pign refrestg. Per plascher s'annunziari entochen ils 28-06-23 tier Sonia, 079 923 39 54.

Fiera ord la cofra ils 19 d'uost 2023

Eis ti denter 6 e 99 onns vegls/veglia? Has ti tschaffen dad esser per in di marcadont/a? Lu pachetescha tias custeivladads, creaziuns ni antiquidads en ina cofra e neu alla fiasta da Cumpadials. La fiera a liug allas 11.00–16.00. Drovass aunc dapli informaziuns ni vul ti gest s'annunziari lu fai quei entochen ils 12-08-2023 tier Cornelia, 079 740 91 64 ni Barbara, 079 304 13 34.

Sault, cant e divertiment

Il musical «Traumfrau Mutter» porscha tut quei. Ils 24-09-2023 organisein nus il viadi a Turitg. Tscha curascha, neu era ti! Per saver empustar in bien plaz fa ei dabasegns da s'annunziari entochen ils 27-06-2023. Per in'annunzia ligionta ni dapli infos contactescha bugen Barbara, 079 304 13 34. L'uniun da dunnas VINAVON separticipescha vid ils cuosts per las cummembras dall'uniun. La suprastonza selegra sin biaras «dunnas da siemi».